

LIGJ
Nr. 105/2020

PËR DISA SHTESA DHE NDRYSHIME NË LIGJIN NR. 79/2017 “PËR SPORTIN”

Në mbështetje të neneve 78 dhe 83, pika 1, të Kushtetutës, me propozimin e Këshillit të Ministrave,

KUVENDI
I REPUBLIKËS SË SHQIPËRISË

VENDOSI:

Në ligjin nr. 79/2017 “Për sportin” bëhen këto shtesa dhe ndryshime:

Neni 1

Pas pikës 7 të nenit 3 shtohet pika 7/1 me këtë përmbajtje:

“7/1. “Karta e tifozit” është një marrëveshje ndërmjet tifozëve dhe organizatës sportive, e cila përcakton të drejtat dhe detyrimet e organizatës sportive ndaj tifozëve të saj dhe anasjelltas, sanksionet bazë për rastet e shkeljes së kësaj marrëveshjeje, si dhe rregullat për mbarëvajtjen e veprimtarisë sportive brenda e jashtë vendit.”.

Neni 2

Në nenin 7, “Sporti në Republikën e Shqipërisë”, pika 1 ndryshohet si më poshtë:

“1. Sporti në Republikën e Shqipërisë është një veprimtari me interes publik.”.

Neni 3

Neni 13, “Financimi i organizatave sportive”, ndryshohet si më poshtë:

“1. Federatat sportive, Komiteti Olimpik Kombëtar Shqiptar dhe Organizata Kombëtare Antidoping financohen me fonde të dhëna nga buxheti i shtetit në formë transferte, të parashikuara në buxhetin e shtetit, si dhe nga burime të tjera të ligjshme.

2. Financimi i federatave sportive olimpike, Komitetit Olimpik Kombëtar Shqiptar dhe Organizatës Kombëtare Antidoping përcaktohet me udhëzim të përbashkët të ministrit përgjegjës për financat dhe ministrit përgjegjës për sportin.

3. Ministria përgjegjëse për sportin financon federatat joolimpike me projekte nga buxheti i saj në formë transferte për veprimtari të propozuara prej tyre, duke pasur në konsideratë impaktin social, ekonomik dhe mjedisor.

4. Ministria përgjegjëse për sportin mbikëqyr dhe kontrollon veprimtarinë dhe administrimin e transfertës së buxhetit të shtetit në të gjitha organizatat sportive që kanë përfituar nga fondet publike.”.

Neni 4

Në nenin 16, “Federatat sportive”, pika 3 ndryshohet si më poshtë:

“3. Të drejtën për të përfituar emërtimin “Federatë shqiptare” e një sporti të caktuar e gëzon ajo organizatë sportive, e krijuar me nismën e personave juridikë dhe/ose personave fizikë të atij sporti, të organizuar sipas legjislacionit për organizatat jofitimprurëse ose tregtarët dhe shoqëritë tregtare, të cilat kanë pranuar emërtimin dhe statutin e federatës.”.

Neni 5

Në nenin 17, “Emërtimi “Federatë shqiptare”, pika 3 ndryshohet si më poshtë:

“3. Akti i emërimit “Federatë shqiptare” i një sporti i revokohet një organizate sportive nga ministri përgjegjës për sportin. Ky i fundit kërkon nga gjykata kompetente heqjen e emërimit nëse:

- a) veprimtaria e saj nuk zhvillohet në përputhje me qëllimet dhe objektivat e përcaktuar në statut;
- b) nuk zhvillohet çdo vit Kampionati Kombëtar dhe Kupa e Shqipërisë;
- c) nuk zhvillohet asambleja vjetore;
- ç) nuk zhvillohet asambleja zgjedhore sipas ciklit olimpike.”.

Neni 6

Neni 21, “Klubet sportive”, ndryshohet si më poshtë:

1. Klubet sportive organizohen dhe funksionojnë sipas legjislacionit në fuqi për organizatat jofitimprurëse ose tregtarët dhe shoqëritë tregtare.

2. Çdo organizatë, që ka personalitet juridik, ka të drejtë të krijojë një shoqatë sportive amatore sipas legjislacionit në fuqi për organizatat jofitimprurëse, e cila organizohet dhe funksionon në bazë të aktit themelues të organit krijues.

3. Transformimi i klubeve sportive sipas pikës 1 të këtij neni, realizohet me vendim të organit krijues brenda një viti nga hyrja në fuqi e këtij ligji.

4. Klubet sportive sipas pikës 1 të këtij neni, përfitojnë financime nga organet e pushtetit vendor, në zbatim të dispozitave të legjislacionit shqiptar në fuqi, nëpërmjet transfertave dhe nga burime të tjera të ligjshme.”.

Neni 7

Pas nenit 21, “Klubet sportive”, shtohet neni 21/1 me këtë përmbajtje:

“Neni 21/1 **Karta e tifozit**

1. Karta e tifozit lëshohet nga organizata sportive pas anëtarësimit të tifozit, sipas llojit të veprimtarisë sportive që kjo organizatë ushtron.

2. Karta e tifozit përmban rregulla për çështjet e anëtarësisë, konsultimin e informimin, aksesin dhe përdorimin e stadioneve, sigurinë e mbrojtjen e spektatorit, tregtimin lidhur me shitjen e biletave, aktivitetet e adresuara komunitetit, si dhe rregulla të tjera kundër racizmit, dhunës, ksenofobisë apo diskriminimit në futboll.

3. Rregullat për procedurën dhe mënyrën për pajisjen me kartën e tifozit përcaktohen në rregulloren e brendshme të organizatës sportive.

Neni 8

Neni 22, “Kapitali shtetëror”, ndryshohet si më poshtë:

1. Institucionet publike qendrore dhe vendore, që kanë në zotërim aksione të shoqërive tregtare sportive, brenda një viti nga hyrja në fuqi e këtij ligji i nxjerrin ato në shitje në përputhje me rregullat dhe procedurat e përcaktuara në legjislacionin në fuqi.

2. Pas kalimit të këtij afati, institucionet publike qendrore dhe vendore nuk mund të zotërojnë aksione të shoqërive tregtare sportive.

3. Nëse në përfundim të periudhës njëvjeçare, aksionet e zotëruara nga institucionet publike në shoqëritë tregtare sportive nuk shiten, këto të fundit marrin formën sipas përcaktimeve të nenit 21 të këtij ligji.

Neni 9

Neni 24, “Zgjidhja e mosmarrëveshjeve”, ndryshohet si më poshtë:

1. Për zgjidhjen e mosmarrëveshjeve në fushën e sportit organizohet dhe funksionon Këshilli i Arbitrazhit Sportiv.

2. Këshilli i Arbitrazhit Sportiv është organ kolegjial, i cili vendos për zgjidhjen e mosmarrëveshjeve për çështje të lidhura me sportin.

3. Të drejtat dhe detyrat e Këshillit të Arbitrazhit Sportiv përcaktohen në rregulloren e tij, e cila miratohet në Asamblenë e Përgjithshme të Komitetit Olimpik Kombëtar Shqiptar.

4. Çdo organizatë sportive dhe çdo sportist apo trajner me titull individual ka të drejtën e ankimit për vendimet e organeve drejtuese dhe mosmarrëveshjeve përpara Këshillit të Arbitrazhit Sportiv.

5. Komiteti Olimpik Kombëtar Shqiptar, federatat shqiptare të sportit, klubet sportive, shoqatat sportive, shoqëritë sportive dhe çdo sportist apo trajner me titull individual pranojnë autoritetin e Këshillit të Arbitrazhit Sportiv. Ky detyrim përfshihet në statutet përkatëse brenda një viti nga hyrja në fuqi e këtij ligji.

Neni 10

Neni 27, “Sporti dhe statusi i sportistit të nivelit të lartë”, ndryshohet si më poshtë:

“Neni 27

Sportisti, trajneri dhe statusi i sportistit të nivelit të lartë

1. Sportistët që përfitojnë statusin e nivelit të lartë, sipas rezultateve sportive në veprimtaritë ndërkombëtare zyrtare:

a) “rekord olimpike”, “rekord botëror”, “rekord europian”, “rekord mesdhetar”, “rekord ballkanik”, “vendi i parë deri në të tetin në Lojërat Olimpike”, “vendi i parë deri në të tetin në kampionate botërore” dhe “vendi i parë deri në të gjashtin në kampionate europiane”, përfitojnë trajtimin, shpërblimin dhe integrimin në sistemin arsimor me drejtim sportiv, sigurisë kombëtare dhe mbrojtjes, punësimin në strukturat e Ministrisë së Mbrojtjes dhe Ministrisë së Brendshme.

b) “vendi i parë deri në vendin e tretë në Lojërat Mesdhetare” dhe “vendi i parë në “Kampionatin Ballkanik””, përfitojnë trajtimin, shpërblimin, integrimin në sistemin arsimor me drejtim sportiv, sigurisë kombëtare dhe mbrojtjes.

c) sportistët e sporteve individuale, sipas federatave përkatëse, përfitojnë këtë status për klasifikime në veprimtaritë ndërkombëtare referuar parashikimeve të pikës 1, shkronjave “a” dhe “b” të këtij neni, sipas përcaktimeve në rregulloret ndërkombëtare të këtyre veprimtarive.

2. Institucionet e arsimit të lartë publik, që ofrojnë programe studimi me drejtim sportiv, siguri kombëtare dhe mbrojtje, sigurojnë kryerjen e studimeve pa konkurs dhe sipas një plani individual për sportistët, të cilët plotësojnë kriteret e përfitimit të statusit të sportistit të nivelit të lartë sipas pikës 1 të këtij neni.

3. Institucionet e arsimit të lartë jopublik, që ofrojnë programe studimi me drejtim sportiv, sigurojnë ndjekjen e studimeve sipas një plani individual për sportistët që përfitojnë statusin e sportistit të nivelit të lartë sipas pikës 1 të këtij neni.

4. Në veprimtari kombëtare zyrtare:

a) sportisti i cili thyen rekordin kombëtar dhe vendi i parë në kampionatin kombëtar për të rritur në sportet individuale, të përcaktuara në rregulloret e federatave përkatëse, përfitojnë trajtimin dhe shpërblimin nga fondet e njësive të qeverisjes vendore;

b) sportistët që fitojnë vendin e parë në kampionatin kombëtar të kategorisë më të lartë në sportet kolektive, të përcaktuara në rregulloret e federatave përkatëse, përfitojnë trajtimin dhe shpërblimin nga fondet e njësive të qeverisjes vendore.

5. Kriteret, mënyra e shpërblimit dhe trajtimit të sportistëve, që përfitojnë statusin e nivelit të lartë dhe trajnerëve të tyre, përcaktohen me vendim të Këshillit të Ministrave.”.

Neni 11

Neni 34, “Destinacioni dhe privatizimi i objekteve sportive”, ndryshohet si më poshtë:

“Neni 34

Destinacioni i objekteve sportive

Destinacioni i objekteve sportive publike nuk mund të ndryshojë, pavarësisht nga subjekti administrues.”.

Neni 12

Në nenin 36, “Transmetimi i veprimtarive sportive”, pika 2 ndryshohet si më poshtë:

“ 2. Të ardhurat e përfituara nga e drejta e transmetimit audioviziv u kalojnë organizatorëve të veprimtarisë sportive në masën njëqind për qind.”.

Neni 13

Në nenin 45, “Kontrolli mjekësor në sport”, pika 3 ndryshohet si më poshtë:

“3. Kontrolli mjekësor për të gjitha kategoritë e ekipeve kombëtare bëhet nga struktura përgjegjëse e kontrollit mjekësor dhe rehabilitimit pranë Agjencisë së Shërbimit të Sporteve.”.

Neni 14

Në nenin 45, “Kontrolli mjekësor në sport”, pas pikës 4 shtohet pika 5 me këtë përmbajtje:

“5. Organizatorët e veprimtarive sportive sigurojnë vendosjen dhe respektimin e protokolleve higjieno-sanitare gjatë zhvillimit të tyre, me qëllim frenimin e përhapjes së sëmundjeve infektive.”.

Neni 15

Neni 50, “Detyrimi për njoftimin e Policisë së Shtetit”, ndryshohet si më poshtë:

“ 1. Organizatori i një veprimtarie sportive është i detyruar të njoftojë Policinë e Shtetit me shkrim, të paktën shtatë ditë kalendarike përpara zhvillimit të saj, me qëllim planifikimin e të gjitha masave të nevojshme të sigurisë për mbarëvajtjen e saj.

2. Në këtë njoftim, organizatorët duhet të përcaktojnë edhe shërbimin privat të sigurisë fizike (SHPSF) dhe/ose policinë bashkiake, shoqatën e vullnetarëve, agjenci të specializuara të shërbimit, të kontraktuara për marrjen e masave të sigurisë dhe shërbimit në mjediset sportive.”.

Neni 16

Në nenin 51, “Ruajtja e rendit dhe e sigurisë publike”, pika 2 ndryshohet si më poshtë:

“ 2. Administratorët e objekteve dhe mjediseve sportive, në bashkëpunim me organizatorët e veprimtarisë, nëpërmjet shoqërive private të sigurisë fizike dhe/ose policinë bashkiake, shoqatën e vullnetareve, agjenci të specializuara të shërbimit duhet të marrin këto masa:

- a) të kryejnë kontrollin rigoroz të tifozëve në portat e hyrjeve në mjedisin sportiv;
- b) të kryejnë sigurimin e vendkalimeve publike në mjedisin sportiv;
- c) të kryejnë drejtimin e spektatorëve tek ulëset në mjedisin sportiv dhe mbajtjen e tyre nën kontroll;
- ç) të kryejnë sigurimin dhe mbrojtjen e lojtarëve nga futja e tifozëve në mjedisin sportiv.”.

Neni 17

Në nenin 51, “Ruajtja e rendit dhe e sigurisë publike”, pas pikës 3 shtohet pika 4 me këtë përmbajtje:

“4. Masat e sigurisë , përgjegjësitë dhe mënyra e ruajtjes së sigurisë në veprimtaritë sportive dhe ndeshjeve të futbollit përcaktohen me vendim të Këshillit të Ministrave.”.

Neni 18

Në nenin 52, “Roli i oficerit të sigurisë”, pika 1 ndryshohet si më poshtë:

“ 1. Në veprimtaritë ndërkombëtare brenda dhe jashtë vendit, organizatorët e veprimtarive sportive dhe ndeshjeve të futbollit marrin masa për sigurinë e ekipeve nëpërmjet kontaktimit të oficerit të sigurisë.”

Neni 19

Në nenin 53, “Ndalimi i hyrjes në mjediset sportive”, pas pikës 6 shtohet pika 7 me këtë përmbajtje:

“7. Personave të cilëve u është ndaluar hyrja në objektet dhe mjediset sportive, sipas parashikimeve të pikave 1 dhe 2 të këtij neni, detyrohen të paraqiten fizikisht pranë komisariteve policore përkatëse në ditën dhe orën e zhvillimit të veprimtarisë sportive, në të cilën u është ndaluar hyrja.”.

Neni 20

Në kreun XII, “Kundërvajtjet administrative”, në nenin 55, pika 2 ndryshohet si më poshtë:

“2. Shkelja e pikës 3 të nenit 5 të këtij ligji përbën kundërvajtje administrative dhe dënohet me gjobë nga njëqind mijë deri në pesëqind mijë lekë.”.

Neni 21

Nxjerrja e akteve nënligjore

1. Ngarkohet Këshilli i Ministrave që brenda 6 muajve nga hyrja në fuqi e këtij ligji të nxjerrë aktet nënligjore në zbatim të neneve 8 dhe 15 të këtij ligji.

Neni 22

Hyrja në fuqi

Ky ligj hyn në fuqi 15 ditë pas botimit në Fletoren Zyrtare.

KRYETAR
Gramoz Ruçi

Miratuar në datën 29.7.2020.